



# ILIDŽA

## INFORMATIVNI BILTEN OPĆINE ILIDŽA

Ilidža • Maj 2018  
• Broj 171





## REDOVNA SJEDNICA OPĆINSKOG VIJEĆA

## Budžet Općine 40.800.000 KM

Općinsko vijeće Ilidža donijelo je na 15. redovnoj sjednici održanoj 14. maja u Multifunkcionalnoj sali Prijedlog izmjena i dopuna Budžeta Općine Ilidža za 2018. godinu u iznosu od 40.800.000,00 KM. Za kapitalne investicije predviđeno je 18.535.069,49 KM, tekući transferi MZ 600.000 KM, za stipendije 600.000 KM, jednokratne pomoći pojedincima 500.000 KM, udruženjima građana 800.000 KM, sportskim udruženjima 390.000 KM, poticaj poljoprivredi 290.000 KM.

## Dvorana će se zvati po Sabitu Hadžiću

Na ovoj sjednici Općinsko vijeće Ilidža donijelo je odluku o davanju naziva univerzalnoj dvorani na Ilidži. Tom odlukom Općinsko vijeće u Javnoj ustanovi "Kulturno sportski i rekreacioni centar Ilidža, daje naziv sportska dvorana "Sabit Hadžić".

Zadužuje se JU da izvrši obilježavanje naziva sportske dvorane, a Zavod za planiranje razvoja Kantona Sarajevo dužan je u roku od osam dana uvrstiti naziv u Registar naziva dvorana.



## Godišnji finansijski izvještaj Općine Ilidža za period od 01. 01. -31. 12. 2017

Općinsko vijeće Ilidža na posljednjoj redovnoj sjednici održanoj 14. maja usvojilo je godišnji finansijski izvještaj Općine Ilidža za period od 01. 01. - 31. 12. 2017. godine prema iskazanom Računu prihoda i rashoda za period 01. 01. - 31. 12. 2017. godine. U ovom periodu ostvareni su prihodi i primici 25.917.728,69, a rashodi i izdaci 23.771.431,88 KM. Razlika između prihoda, primitaka i rashoda i izdataka 2.146.296,81 KM I prenosi se u Budžet za 2018. godinu, a raspored viška prihoda, primitaka i rashoda i izdataka za 2017. godine, bit će utvrđena posebnom odlukom.

## Usvojen izvještaj o izvršenju Budžeta za prva tri mjeseca

Općinsko vijeće Ilidža na 15. redovnoj sjednici održanoj 14. maja 2018. godine, usvojilo je Izvještaj o izvršenju Budžeta Općine Ilidža za period 01. 01.-31. 03. 2018. godine. Ukupno ostvareni prihodi i primici iznose 8.623.269,27, a ostvareni rashodi i izdaci 5.540.615,36. Razlika između ostvarenih prihoda i primitaka i rashoda i izdataka 3.082.653,91 KM. Razlika između ostvarenih prihoda i primitaka i rashoda i izdataka iz tekućeg perioda u iznosu od 3.082.653,91 KM prenosi se u budžet za naredni period.


**REDOVNA SJEDNICA OPĆINSKOG VIJEĆA**

## Prijedlozi akata o regulisanju imovinsko-pravnih odnosa

Vijeće je usvojilo prijedlog akata o regulisanju imovinsko-pravnih odnosa i to prijedloge rješenja o rješavanju imovinsko-pravnih odnosa u svrhu legalizacije stambenih objekata po zahtjevima Bešić Nedžada, Kadrić Remzije i Kadrić Mirsada i Karabatak Vukosava. Usvojeni su i prijedlozi rješenja o rješavanju imovinsko-pravnih odnosa u svrhu legalizacije poslovnih objekata po zahtjevima Čengić Enisa i Ibrahimović Rajne Delić, te prijedloge rješenja o rješavanju imovinsko-pravnih odnosa u svrhu legalizacije stambeno-poslovnog objekta po zahtjevu Hasanović Senada i prijedlog rješenja o rješavanju imovinsko-pravnih odnosa u svrhu legalizacije poslovno-skladišnog objekta po zahtjevu Gušo Mithata. Usvojen je prijedlog rješenja obnovi postupka Bošnjak Vesne.

## Utvrđena prosječna konačna cijena stambene površine i visina rente

Vijeće je na sjednici donijelo Odluku o utvrđivanju prosječne konačne građevinske cijene po metru kvadratnom korisne površine u stambenoj izgradnji na području općine Ilidža u 2017. godine u iznosu od 1075 KM i Odluku o visini naknade za pogodnost gradskog građevinskog zemljišta-rente na području općine Ilidža za 2018. godinu. Naknada se određuje po zonama u procentu od konačne prosječne građevinske cijene po metru kvadratnom korisne stambene površine. Prva zona šest posto što iznosi 64,50 KM, druga pet posto i iznosi 53,75 KM, treća četiri posto ili 43,00 KM, četvrta tri posto ili 32,25 KM, peta dva posto ili 21,50 KM i šesta zona jedan posto što iznosi 10,75 KM.



## Usvojen Plan stipendiranja učenika i studenata slabijeg imovnog stanja

Na osnovu Pravilnika o stipendiranju učenika i studenata slabijeg imovnog stanja Općinsko vijeće je na sjednici donijelo Plan stipendiranja učenika u srednjem i studenata u visokoškolskom obrazovanju za školsku 2018/2019. god-

inu. Ovim planom planirana su budžetska sredstva u ukupnom iznosu od 120.000 KM za stipendiranje 90 učenika i studenata. Stipendirat će se 40 učenika čija stipendija iznosi 75 KM mjesečno i 50 studenata sa po 100 KM mjesečno.



## Nacrt Odluke o usvajanju i provođenju Urbanističkog projekta „Spomenički kompleks Tunel D-B“

Općinsko vijeće Ilidža na sjednici održanoj utvrdilo je Nacrt odluke o usvajanju i Nacrt Odluke o provođenju urbanističkog projekta „Spomenički kompleks Tunel D-B“ koji se upućuju na javnu raspravu u trajanju od 30 dana. Za provođenje javnog uvida i javne rasprave zadužena je Služba prostornog uređenja u saradnji sa Zavodom za planiranje razvoja Kantona Sarajevo koji su dužni da podnesu izvještaj o rezultatima javne rasprave i pripreme prijedlog Odluke o usvajanju i provođenju Urbanističkog projekta „Spomenički kompleks Tunel D-B“.

## Novi predsjednik Komisije za prostorno planiranje Ahmed Krupalija

Općinsko vijeće Ilidža donijelo je rješenje o razriješenju predsjednika Komisije za prostorno planiranje, mjesne zajednice, komunalne poslove i ekologiju, na zahtjev SDA, Tarika Stambolića. Na mjesto predsjednika Komisije za prostorno planiranje Općinskog vijeća imenovan je Ahmed Krupalija.



## Informacije

Na sjednici Vijeća bila je i Informacija o zimskom održavanju cesta na području općine Ilidža za 2017/2018. godinu koju je Vijeće primilo k znanju. U informaciji koja je bazirana kroz tretman uklanjanja snijega sa kolovoza sa pratećim aktivnostima neophodnim za odvijanje bezbjednog pješačkog i motornog saobraćaja, te održavanju saobraćajne signalizacije. Zimsko održavanje saobraćajnica provođeno je u periodu od 15. novembra 2017. do 15. marta 2018. godine po utvrđenim prioritetima sa određenim i osposobljenim bazama i mehanizacijom opremljenom za

izvođenje radova. Nadzor nad poslovima zimskog održavanja lokalnih cesta provođen je putem Službe za razvoj, komunalne poslove i puteve uz pomoć sekretara mjesnih zajednica.

Vijeće je na sjednici primilo k znanju i informacije o realizaciji Programa rada Općinskog vijeća za period januar-mart 2018. godine. Program rada Općinskog vijeća koncipiran je da se realizuje kroz održavanje redovnih, tematskih i svečanih sjednica. U ovom periodu Općinsko vijeće je održalo tri redovne sjednice i dvije svečane sjednice i to u povodu Prvog marta-Dana nezavisnosti Bosne i Hercegovine i 12. marta-Dana Općine Ilidža. Vijeće je u ovom periodu razmatralo 24 materijala.



## Predata dva kućišta za radare MUP-u Kantona Sarajevo

Općina Ilidža izvršila je nabavku i ugradnja dva kućišta stacionarnog radara za proširenje sistema za povećanje bezbjednosti saobraćaja. Kućišta su ugrađena na magistralnoj cesti M-5, Gladno polje, neposredno poslije raskrsnice sa ul. Plantaže i Magistralna cesta M-5, Rakovica, neposredno pored Devete osnovne škole Rakovica. Vrijednost radova je 52.486,20 KM. Izvođač radova bile su MIBO komunikacije d.o.o.

Kućišta će biti predana Ministarstvu unutrašnjih poslova Kantona Sarajevo na dalje korištenje.

Načelnik Općine Ilidža prof. dr. Senaid Memić i komesar Uprave policije MUP-a Kantona Sarajevo Mevludin Halilović 31. maja 2018. godine u Općini Ilidža potpisali Ugovor o primopredaji kućišta.

“Na osnovu analize naših pripadnika saobraćajne policije i na zahtjev lokalne zajednice postavljena su kućišta i bit će postavljeni radari, a sve u cilju poboljšanja ukupnog stanja sigurnosti prometa na cestama i smanjenja broja težih prometnih prekršaja, Hvala Općini Ilidža sa kojima smo i do sad imali dobru saradnju i koja je na naše zahtjeve izdvajala značajna sredstva iz svog budžeta za naše opremanje” rekao je komesar Halilović.

“Lokacije radarskih kućišta utvrđene su analizom stanja sigurnosti saobraćaja na cestama, a kućišta su stabiljena na kritična mjesta gdje se u ranijem razdoblju događale saobraćajne nesreće. Općina Ilidža svake godine pomaže u opremanju MUP-a Kantona Sarajevo, a nastaviti ćemo to raditi i ubuduće, a sve u interesu sigurnosti naših građana” dodao je načelnik Memić.

Cilj ovih nabavki je unaprijediti sistem sigurnosti saobraćaja te raditi dodatno na zaustavljanju divljanja pojedinih vozača, budući da na ulicama često stradaju i nedužni pješaci. Koliko se samo nesavjesnih vozača svakodnevno kreće ulicama glavnog grada BiH, dovoljno svjedoči podatak da je u prošloj godini policija napisala čak 36.774 prekršajnih naloga koji su rezultirali postojećim radarskim uređajima u Kantonu Sarajevo.

## Održana prezentacija Nacrta urbanističkog projekta “Spomenički kompleks Tunel D-B”

U MZ Donji Kotorac 28. maja 2018. godine održana je prezentacija Nacrta Urbanističkog projekta “Spomenički kompleks Tunel D-B”.

Kako je, između ostalog rečeno na prezentaciji sve pismene primjedbe, sugestije i prijedloge na Nacrt Urbanističkog projekta “Spomenički kompleks Tunel D-B” se mogu dostaviti u MZ Donji Kotorac, ul. Branilaca Donjeg Kotoraca do br. 26, kao i na protokol Općine Ilidža ili elektronski.

Za detaljne informacije, obavještanje i pomoć pri formulisanju primjedbi, građani i zainteresovana pravna lica se mogu obratiti i u sobu br. 10, Centar za dozvole, prizemlje - Općina Ilidža.

Javna rasprava o temi Urbanistički projekat “Spomenički kompleks Tunel D-B” će se održati 25. juna u 17,00 sati u Multifunkcionalnoj sali ul. Butmirska cesta br. 12.

Pozivaju se građani, kao i zainteresovana pravna lica da prisustvuju javnoj raspravi, te daju svoje prijedloge, primjedbe i sugestije na Nacrt Urbanističkog projekta “Spomenički kompleks Tunel D-B”.

Primjedbe se mogu dostaviti najkasnije do 10. jula 2018. godine (15 dana od dana održavanja javne rasprave).



## Uručeno 320 knjiga bibliotekama

Općina Ilidža kontinuirano realizuje projekt pomoći bibliotekama u obogaćivanju knjižnog fonda nabavkom novih izdanja i literature za mlade ljude.

Postojeći knjižni fond u bibliotekama ne može zadovoljiti potrebe mladih ni kvantitetom ni kvalitetom. Tako je Općina Ilidža i ove godine u svrhu pomoći bibliotekama u poboljšanju knjižnog fonda, nabavila 320 knjiga koje je donirala JU Biblioteka Sarajevo-Bibliotečkom odjeljenju Ilidža, te bibliotekama u sastavu Javne ustanove za kulturu i rekreaciju Hrasnica-Ilidža, JU Četvrta gimnazija Ilidža i JU Srednja tehnička škola grafičkih tehnologija, dizajna i multimedije. Knjige koje bi mogle zadovoljiti interes mladih su izabrane po preporuci JU Biblioteka Sarajevo. Za nabavku knjiga Općina je izdvojila 5.828,50 KM.

Načelnik Općine Ilidža prof. dr. Senaid Memić uručio je 22. maja 2018. knjige predstavnicima ovih biblioteka, izrazivši nadu da će ova donacija propraviti jezičke sposobnosti i podići nivo čitanosti.



## Delegacija Općine Korfez u posjeti Općini Ilidža

Delegacija Općine Korfez, oblast Kocaeli iz Turske, predvođena zamjenikom načelnika Belediyem Baskar Yardimcisiom posjetila je 4. maja Općinu Ilidža.

Sa načelnikom Općine Ilidža prof. dr. Senaidom Memićem razgovarali su o mogućoj saradnji iz oblasti obrazovanja, sporta i kulture, kao i bratimljenju dvije općine.

Prema posljednjim podacima broj stanovnika ove općine je 160.000 stanovnika i najrazvijenija je privredna općina u Istanbulu gdje je 950 uposlenih.

Općina je poznata po festivalu trešanja.



## Otvoren hotel "Austria & Bosnia"

Svečano otvorenje renoviranih hotela "Austria" i "Bosna" na Ilidži upriličeno je 10. maja 2018. godine, u prisustvu brojnih visokih zvaničnika. Luksuzno zdanje sa pet zvjezdica ima 115 smještajnih jedinica, 300 ležajeva, 12 apartmana među kojima je i predsjednički, restorane, kongresne sale, wellness centre, parking i garažu. Predsjednik uprave "Hoteli Ilidža" Alija Budnjo zahvalio je svim privrednicima i saradnicima koji su mu pomogli u proteklih desetak godina da završi projekt, počevši od hotela Terme, Hercegovina, Crystal, pa sad do hotela Austria i Bosna.

"Od 2003. do 2004. godine smo obnovili hotel Terme i registrovali Zdravstvenu ustanovu banju Terme Ilidža. Od 2004. do 2007. godine renovirali smo hotel Hercegovinu i pustili u rad. Godine 2008. smo renovirali hotel Crystal. Od 2011. godine renovirali smo kongresni centar i proširili Zdravstvenu ustanovu banju Ilidža. Od 2016. do danas smo renovirali i završili hotel Austriju i Bosnu. Oni su u kategoriji pet zvjezdica, a u regionu jedni od najopremljenijih", naveo je u svom obračanju Budnjo.

Presijecanjem vrpce početak rada hotela ozvaničili su Bakir Izetbegović, predsjedavajući Predsjedništva BiH, Denis Zvidić, predsjedavajući Vijeća ministara BiH i Alija Budnjo, predsjednik uprave "Hoteli Ilidža."



## Okrugli sto "Budi poduzetnica na Ilidži"

Bolji život u BiH je cilj i zadatak kompletnog radno-aktivnog stanovništva, a najveći pravi potencijal leži u nezaposlenom stanovništvu. Žene čine 63 posto nezaposlenih, a istraživanja pokazuju da prihodi žena puno više doprinose poboljšanju kvaliteta života u porodici, nego isti nivo prihoda muškaraca. Sve su ovo elementi koji ukazuju na moguća rješenja zajedničkih pitanja.

Udruženje poslovnih žena u BiH u saradnji s Općinom Ilidža organizovalo je 08. maja 2018. godine okrugli sto - Budi poduzetnica na Ilidži.

Žene su spremne, hrabre, pouzdane i mogu preuzeti inicijative u poduzetništvu, ali postoje ključne stvari koje se moraju promijeniti kako bi žene uspjele realizirati svoje ideje u praksi.

Potrebno je također jačanje svijesti o ženama u poduzetništvu, edukacija, pomoć općine u budžetu, redovno mjesečno okupljanje, umrežavanje kao i redovni pristup informacijama Federalnog zavoda za zapošljavanje, saradnja sa drugim općinama neki su od zaključaka ovog okruglog stola. Većina „ naučnih “ istraživanja problematike poduzetništva ističe da je kod nas procedura osnivanja poduzeća skupa, jako komplicirana, da postupak jako dugo traje, da birokratija pravi probleme i da je to jedan od glavnih problema u poduzetništvu. Tome se treba posvetiti posebna pažnja i pojednostaviti procedura, a sve u cilju motivisanja i otvaranja što većeg broja radnih mjesta.

Na okruglom stolu čule su se pozitivne priče žena poduzetnica Vere Kapetanović-Bujak, Ivane Krilić, Selme Salčin, Edite Kečo, Irmele Jugo, Adise Tufo, Ninoslave Hadžimuratović, žena čija energija i hrabrost danas za rezultat ima uspješno vođenje firme i uz to priliku da posao uz njih nađu još mnoge žene.

"Drage naše Ilidžanke, to što umijete heklati, krojiti haljine, praviti kolače, džemove i ajvar, slikati, razvijati softver, praviti reklame, njegujuće kreme, suvenire, pretvorite to u biznis Zakoračite u svijet poduzetništva. Možda nije lako ali nije ni nemoguće, poručila je Azra Jahić, vjećnica u Općinskom vijeću i predsjednica Komsije za zaštitu ljudskih prava, predstavnici i prijedloga OV koja je nosioc izrade Gender akcionog plana Općine Ilidža.

Poduzetnice je pozdravio i načelnik Općine Ilidža prof. dr. Senaid Memić, koji je istakao da su njegova vrata otvorena za sve vrste pomoći.



## U toku asfaltiranje četiri ulice

**N**a području općine Ilidža u toku je rekonstrukcija četiri ulice. Za te namjene iz Budžeta je izdvojeno 636.000 KM.

Završeno je asfaltiranje ulice Četvrte Viteške brigade u dužini od 425, širini šest metara. Investitor je Općina Ilidža, a izvođač radova bila je firma KJKP RAD d.o.o. Sarajevo. Vrijednost ovih radova je 259.000,00 KM

U toku je rekonstrukcija ulica Blažujski drum, Remze Ahmetović II faza, Zenik.

Stanovnici ulice Blažujski drum dobit će novi asfalt u dužini 270 i širini 5,5 metara. Finansijer je Općina Ilidža, a izvođač radova je Bosman d.o.o. Vrijednost radova je 171.000,00 KM.

Radnici firme GP ing d.o.o rade ulicu Remze Ahmetović II fazu, a za te radove Općina je izdvojila 105.000,00KM.

Dužina ulice koja se asfaltira je 180 metara, a širina je pet i po metara.

Radi se i rekonstrukcija ulice Zenik čija dužina je 545, a širina pet metara. Vrijednost tih radova iznosi 101.000,00, a investitor je Općina Ilidža, dok je izvođač radova Braća Mujić d.o.o.

Općina Ilidža je do sada izvršila asfaltiranje četiri ulice koje su finansirane od strane Općine Ilidža 70 a građana 30 posto.



Vrijednost radova je oko 80.000,00 KM. Izvođač radova je konzorcij firmi OXA d.o.o i Demus d.o.o.

Pored ovih saobraćajnica, u toku ove godine planirano je asfaltiranje još 30 saobraćajnica koje se finansiraju uz učešće građana. Izvođač radova na svim saobraćajnicama je konzorcij firmi OXA d.o.o i Demus d.o.o.

Inače, za ovu vrstu asfaltiranja saobraćajnica Općina Ilidža je u budžetu izdvojila 700.000,00 KM.



## Podijeljeno 200 paketa

**U**povodu mjeseca Ramazana, Regionalni ured lige Muslimanskog svijeta u BiH i Kulturni centar princeze Dževhere Bugojno donirali su 200 paketa prehrambenih artikala socijalno ugroženim porodicama na području općine Ilidža. Paketi su uručeni 24. maja u Općini Ilidža. Abdulah Kari, direktor Regionalnog ureda lige Muslimanskog svijeta izrazio je nadu da će ovi paketi bar malo olakšati ramazanske dane i da su otišli u prave ruke.



## Obnovljeni turistički info-panoi

**T**uristički info-panoi Općine Ilidža koji su postavljeni 2012. godine, a u cilju poboljšanja ukupne turističke ponude, u maju ove godine su obnovljeni i dopunjeni novim sadržajima. Na obnovljenim slobodnostojećim dvostranim panoima sa jedne strane postavljena je nova turistička karta općine Ilidža na kojoj su sada i vizuelno ucrtani i označeni svi najznačajniji turistički sadržaji koji su na raspolaganju posjetiocima Ilidže. Ucrtane su lokacije 11 nacionalnih spomenika i ostale kuturno-historijski znamenitosti, te sakralni objekti, hoteli, moteli, zdravstvene ustanove, sportski objekti, pošte, taksi stajališta, izletišta i sve drugo potrebno za ugodan boravak i lakše snalaženje turista na području općine. Sa druge strane panoa predstavljeni su najznačajniji kulturno-historijski spomenici, prirodne ljepote i ostali turistički sadržaji Ilidže sa osnovnim podacima, ilustrovani fotografijama. Panoi se nalaze na pet pješački najprometnijih lokacija, ispred zgrade Općine, na tramvajskom terminalu, u Maloj Aleji kod pješačkog mosta, u Velikom parku i na Vrelu Bosne.





## Posjeta osnovaca Memorijalnom centru Poročari

U organizaciji Općine Ilidža i ove godine, u cilju odatvanja počasti žrtvama genocida i suosjećanja sa onima koji su izgubili svoje najmilije, 15. maja 2018. godine organizovana je jednodnevna posjeta Memorijalnom centru Potočari, Srebrenica. Kolona od 12 autobusa u pratnji automobila policije i ambulantskih kola udruženja „Paramedic“ Gorske službe spašavanja i ambulante Doma zdravlja Ilidža u ranim jutarnjim satima uputila se prema Srebrenici. Učenici su za nešto manje od četiri sata vožnje stigli u Potočare. Jačina šehidskog svjetla jasan je putokaz za buduće generacije. Potočari, simbol otpora i simbol stradanja. Svaka posjeta ovom mjestu nosi nova, stara pitanja.



Zar je moguće da su „vođe“ jednog naroda počinile toliko zla? Odakle toliko zla u ljudima? Toliki bijes, mržnja, taština, pohlepa, požuda, agresivnost... Neki ljudi su se igrali Boga. Nažalost, svjedoci smo da je Srebrenica u 20. stoljeću postala najmasovnijom ljudskom grobnicom. Kad bismo svi na ovom „svetom mjestu“ pogledali bijele nišane i pročitali imena i godišta, naše srce ne bi smjelo biti isto. Više od osam hiljada mrtvih? Čak 8.372 čovjeka... Koliko je suza proliveno i utkano u svaku ovu brojku? To je jedan čitav grad... Na kratkom historijskom času predavač koji je i sam preživio genocid podsjetio je ilidžanske osnovce na događaje koji su se desili ovdje 1995. godine. Na historijskom času za osnovce podcrtano je da se po intenzitetu ubijanja i vremenskom okviru u julu 1995. godine dogodio nezapamćeni pokolj civilnog stanovništva.



„Genocid u Srebrenici dogodio se 11. jula kada su masovno ubijani Bošnjaci, muškarci u rasponu od 12 do 80 godina. Genocid je počinila Vojska Republike Srpske pod komandom generala Ratka Mladića, kojoj su se priključili Škorpioni, paravojna formacija pod kontrolom srbijanskog Ministarstva unutarnjih poslova. To je najstrašniji događaj u savremenoj evropskoj povijesti. Tu se desio najveći pokolj u Evropi nakon Drugog svjetskog rata u kojem je ubijeno više od 10.000 ljudi“ riječi su predavača u Potočarima.

Zerina Mujanović, učenica Osme osnovne škole „Amer Čenanović“ koja je prvi put u Srebrenici nije krila emocije.

„Neshvatljivo je ovo što sam vidjela. Toliko tuge na jednom mjestu. Hvala Općini Ilidža koja nam je omogućila ovu posjetu da uživo osjetimo“ rekla je Zerina.

Tarik Pala učenik Treće osnovne škole rekao je da ima ukopanu rodbinu u Potočarima



„Ovdje se uvijek osjećam tužno i suosjećam se sa svim ljudima koji su preživjeli genocid i poručujem vladarima svijeta nemojte dozvoliti da se više ikom dogodi Srebrenica“ dodao je Tarik.

Potom su osnovci obišli Tvornicu akumulatora i pogedali film a i izložbu fotografija.

Muk tišine u Potočarima govori više od riječi. Normalnom ljudskom biću je neshvatljiva mržnja koja je rezultirala višednevnom pokolju, samo zato jer su se drugačije zvali, zaključili su osnovci prilikom posjete.

Općina Ilidža je za sve učenike i ove 11. godine, osim prijevoza, osigurala sendviče, napitke. Za ovaj humani i edukativni projekt općina je iz budžeta izdvojila 13.000 KM.





## Vijećnici Općinskog vijeća Ilidža na Akademiji ravnopravnosti 2018

Akademija ravnopravnosti 2018, koju zajednički organizuju fondacija Friedrich Ebert Stiftung Bosnien und Herzegowina i Sarajevski otvoreni centar, prošlog vikenda je održala na Ilidži prvi modul u čijem je fokusu edukacija o rodnoj ravnopravnosti i položaju deprivilegovanih grupa u našem društvu.

Kroz ukupno četiri modula Akademije, učesnici i učesnice iz cijele Bosne i Hercegovine će imati priliku da prošire svoja znanja o institucionalnoj borbi za rodnu ravnopravnost u Bosni i Hercegovini.

U ovoj četvrtoj generaciji Akademije ravnopravnosti učestvuju vijećnica i vijećnik iz Općinskog vijeća Ilidža – Azra Jahić i Samir Avdić, koji su učesnike i učesnice, između ostalog, informisali o izradi i implementaciji Gender akcionog plana Općine Ilidža za period 2017-2020, te drugim inicijativama koje planiraju pokrenuti u OV Ilidža.

## Obuka općinskih službenika u oblasti zaštite ličnih podataka

Agencija za zaštitu ličnih podataka Bosne i Hercegovine u saradnji sa Općinom Ilidža održala je obuku općinski službenika u Kantonu Sarajevo u oblasti zaštite ličnih podataka. Obuka je održana 10. maja 2018. godine u multifunkcionalnoj sali Općine Ilidža. Obuci su prisustvovali općinski službenici iz svih devet općina Kantona Sarajevo kojim je po prirodi poslova koje obavljaju potrebno sticanje novih znanja iz oblasti zaštite ličnih podataka i koji će stečena znanja sa obuke moći adekvatno prenijeti drugim službenicima iz svoje institucije. Predavač na obuci je bila Nedžmija Kukričar, stručni savjetnik za inspeksijske poslove Agencije za zaštitu podataka BiH koja je na cjelovit način, uz praktične primjere i aktivno učešće prisutnih, prezentirala Zakon o zaštiti ličnih podataka.



## Općina Ilidža i dalje lider bo broju dolaska turista

Prema podacima Zavoda za informatiku i statistiku Kantona Sarajevo, Ilidža već 11 godina drži leadersku poziciju po broju dolazaka turista, ostvarenih noćenja, broju smještajnih jedinica i ležaja, te se nalazi i u samom vrhu na nivou BiH.

Na području općine Ilidža trenutno je raspoloživo 30 smještajnih objekata sa više od 2.200 smještajnih jedinica i 5.000 ležaja, što čini 1/8 ukupnih smještajnih kapaciteta na nivou BiH.

Investicije privatnog sektora tokom 2018 godine koje su stavljenje u funkciju dodatno će ojačati poziciju i ponudu Ilidže na turističkoj karti. Adaptacija i izgradnja novih objekata Hotela "Austria" i hotel "Bosna" sa 115 smještajnih jedinica, a sve to u okviru Hotelsko banjsko rekreativnog društva "Hoteli Ilidža" d.d., zatim izgradnja dijela hotela "Hollywood" koje direktno utiče na povećanje broja smještajnih jedinica, u okviru "Mrkulić company".



Na osnovu dostupnih podataka poboljšanje ponude na Ilidži prati i konstantni porast posjetitelja na dva najatraktivnija lokaliteta a to su Park prirode "Vrelo Bosne" koji je posjetilo protekle godine više od 200.000 turista i Spomenički kompleks "Tunel D-B" gdje je u 2017 godini zabilježio 130.000 posjeta.



## Obilježen Dan pobjede nad fašizmom

Drugi svjetski rat u Evropi, u kojem je živote izgubilo više od 50 miliona ljudi, završen je prije 73 godine. Taj dan, 9. maj obilježava se kao Međunarodni dan pobjede nad fašizmom. Tim povodom zajednička delegacija Općine Ilidža i Udruženja antifašista i boraca narodnooslobodilačkog rata Ilidža položili su cvijeće na spomen-kosturnicu u Velikom parku na Ilidži i odali počast svim poginulim u Drugom svjetskom ratu i proteklom odbrambeno-oslobodilačkom ratu u Bosni i Hercegovini. Svečanosti su pored članova UABNOR-a prisustvovali i predstavnici Općine Ilidža, boračkih udruženja, političkih partija, izviđača, učenika i brojni građani.



## Sjećanje na šehide i poginule borce

U organizaciji Udruženja „Žene Kasindolske 92“, Udruženja boraca Prve samostalne brigade Sarajevo i Općine Ilidža, 14. maja 2018. godine obilježen je Dan odbrane Ilidže, godišnjica formiranja Prve samostalne brigade Sarajevo, Dan stradanja građana Kasindolske ulice kao i Dan mjesne zajednice Stup II. Položeno je cvijeće na mjesto zarobljavanja stanovnika Kasindolske ulice i na centralno spomen obilježje na Stupu. Na taj način odana je počast šehidima i poginulim borcima koji su dali svoje živote za odbranu Ilidže i Bosne i Hercegovine. Nakon toga, u prisustvu boraca, rodbine, prijatelja, predstavnika boračkih udruženja i Općine ispred Mjesne zajednice Stup II održan je historijski čas u povodu obilježavanja 26. godišnjice formiranja Prve samostalne brigade Sarajevo uz učešće jedinice za odavanje počasti Oružanih snaga BiH. Organizovan je prigodan program na kojem su evocirane uspomene na slavni put ove brigade, a postavljena je i izložba naoružanja, opreme i fotografija iz ratnog perioda. O značaju brigade prisutnim su govorio je Bajro Čolo.

Prva samostalna brigada zvanično je formirana 19. maja 1992. godine od veće postojećih jedinica sa područja ilidžanskih mjesnih zajednica Otes, Stup, Stup II i Stupsko brdo koje su joj bile zona odgovornosti. Brigada je bila nosilac odbrane ovih prostora i sudjelovala je u svim defanzivnim i ofanzivnim borbama aktivnostima na ovom važnom pravcu odbrane grada Sarajeva i države Bosne i Hercegovine. Prigodan program izvela su djeca iz vrtića „Tom i Džeri“.



## Obilježen Dan logoraša općine Ilidža

Alaganjem cvijeća ispred spomen-ploče na Srednjoj tehničkoj školi, grafičkih tehnologija, dizajna i multimedije, 11. maja 2018. godine, obilježen je Dan logoraša Općine Ilidža pod nazivom „Da se ne zaboravi i ne ponovi“. Cvijeće su položili delegacije Općine Ilidža udruženja logoraša Općina Ilidža, Stari Grad, Centar i Novi Grad, Udruženje ubijene djece opkoljenog Sarajeva i Ministarstva za boračka pitanja Kantona Sarajevo. Mnogobrojnim prisutnim obratili su ministar za boračka pitanja Kantona Sarajevo Muharem Fišo i predsjednik Udruženja logoraša Općine Ilidža Enes Dželilović koji su se zahvalili prisutnim na njihovom dolasku i poručili da je potrebna veća materijalna potpora ovoj kategoriji društva koja još uvijek nema zakonski okvir, kojim bi riješili svoja statusna pitanja. Na području općine Ilidža tokom agresije bilo 12 logora kroz koje je prošlo 807 logoraša koji su nevini ljudi zvjerski mučeni i ubijani, a počinioci zlodjela nisu otkriveni i procesuirani. Prigodan program izveli su učenici Prve osnovne škole.

## Esad Delić dobio ponovo povjerenje RVI Ilidža

U restoranu Izvor Bosne 14. maja održana je redovna izvještajno izborna Skupština Udruženja RVI Ilidža i društva „Izvor Bosne“. Svoj mandat potvrdio je Esad Delić, koji je izabran ponovo za predsjednika, dok je za predsjednika Skupštine ponovo povjerenje dobio Salko Ibrahimović.





## Obilježena godišnjica odbrane Stojčevac

U organizaciji Udruženja 2. motorizovani bataljon 4. viteške motorizovane brigade i Općine Ilidža u prisustvu boraca, članova porodica šehida i poginulih boraca, predstavnika Općine, učenika i brojnih građana, 15. maja 2018. godine, održan je historijski sat „Odbrana Stojčevca“. Na spomen-obilježje Stojčevac, poginulim borcima Harisu Opankoviću, Nedžadzu Granulugigiju položeno je cvijeće, proučena Fatiha i odata počast i dužno poštovanje svim šehidima i poginulim borcima. Cvijeće je položeno i ispred spomen-obilježja ispred Doma kulture u Hrasnici. Tog 15. maja 1992. godine nakon povlačenja snaga UN-a, agresor je krenuo u osvajanje Stojčevca strateški najvažnijeg mjesta za odbranu Ilidže, Sarajeva, a i Bosne i Hercegovine. U tome su ih, nakon teških i krvavih borbi, spriječili borci 104. motorizovane brigade Armije RBiH i sačuvali ovaj strateški značajan prostor. Od tog dana svakodnevno su se vodile žestoke borbe sa agresorom za očuvanje ovih teritorija, pa je ovaj datum simbol svih tih bitaka, dan sjećanja na sve šehide i poginule borce koji su dali svoje živote za slobodu i odbranu ove teritorije i cijele Bosne i Hercegovine. Ovaj značajan datum je ujedno i godišnjica formiranja 2. motorizovanog bataljona 4. viteške motorizovane brigade i Dan mjesne zajednice Hrasnica II, koji su tradicionalno obilježeni nizom kulturno-sportskih manifestacija. Tim povodom održan je svečana akademija u Domu kulture Hrasnica i memorijalni turnir u malom nogometu „Haris i Gigi“ na kome su učestvovali učenici osnovnih škola sa Ilidže.

## Dan odbrane Ilidže 2

U organizaciji JOB-a Općine Ilidža-Unija veterana, Četvrte viteške brigade i Općine Ilidža 14. maja 2018. godine održan je tradicionalni Memorijalno-historijski susret „Odbrana Ilidže 2“.

Na mjestu bitke kod Ljetne pozornice cvijeće su položili i proučili Fatihu u znak poštovanja i sjećanja na poginule, predstavnici Općine, JOB-a, delegacija Drugog motorizovanog bataljona Četvrte viteške brigade, kao i članovi porodica šehida i poginulih branitelja.

“Tog 14. maja 1992. na ovom mjestu vodila se najznačajnija bitka za odbranu ilidžanskih teritorija. Osim bitke, taj 14. maj ostao je upamćen i kao događaj kada su snage UNPROFOR-a mirno ćutale i posmatrale, a to nisu smjele. Tada su pripadnici UNPROFOR-a svojim transporterom, 15. maja, poveze teško ranjene Anesa Bučana, Jagodu Galešić i Ismeta Osmanovića preko ilidžanske teritorije u bolnicu Koševo. Tog četvrtka, slabo naoružani borci, heroji odbrane, stupili su u ratni okršaj sa mnogo jačim naprijatelj, odlučni u toj borbi da daju i svoje živote. Ovo organizujemo najviše zbog generacija koje dolaze, kako bismo kazali šta se to dešavalo u najtežim ratnim krvavim godinama naše historije, a što ne mogu djeca učiti u svojim školama” rekao je između ostalog general Fikret Prevljak, komandant Četvrte viteške motorizovane brigade.

Nagrađeni su i učenici koji su pisali rad “Tako se branila Bosna” iz Šeste osnovne škole. Treće mjesto Almina Krupalija, drugo Azra Rovčanin i prvo Amel Kreho.

## Sjećanje na Senaida Oručevića-Cepu

U organizaciji Udruženja organizatora otpora veterana rata, dobrovoljaca, prvoboraca i branilaca „Zelene beretke“, 22. maja 2018. godine u prisustvu rodbine, prijatelja, saboraca, predstavnika boračkih udruženja i Općine, obilježena je 26. godišnjica pogibije šehida Senaida Oručevića-Cepe. Članovi porodice, delegacije Općine, Zelenih beretki i Četvrte viteške brigade položili su cvijeće na spomen obilježje u prostorijama PU Ilidža i proučili Fatihu i odali počast ovom šehidu.

Rahmetli Senaid se među prvima priključio Zelenim beretkama i aktivno se uključio u odbranu Bosne i Hercegovine. Od posljedica ranjavanja u akciji „Odbrana Ilidže 2“ izgubio je bitku za život pripadnik Zelenih beretki Bosna 86 i rezervnog sastava MUP-a RBiH. Brigadir Emir Redžović u ime Četvrte viteške motorizovane brigade dodijelio je posthumno Zlatnu plaketu Senaidu Oručeviću-Cepi za izuzetan doprinos u odbrani Bosne i Hercegovine. Plaketu je primio sin rahmetli Senaida.



## Položeno cvijeće na centralno spomen-obilježje

Za sve Bosance i Hercegovce 9. maj izuzetno je značajan datum, datum kada se slavi Dan pobjede nad fašizmom i Dan Zlatnih ljiljana.

Povodom 9. maja, Delegacije Udruženja dobitnika najvećih ratnih priznanja „Zlatni ljiljan“ i „Zlatna policijska značka“, ispred centralnog spomen obilježja na Ilidži položile su 4. maja 2018. godine cvijeće i odale počast svim poginulim borcima na Ilidži.

“Ponosni smo jer smo, iako slabo naoružani i od mnogih već osuđeni na poraz, odbranili i sačuvali svoju BiH. Ali vječno moramo pamtili naše hrabre sinove. I ove kao i ranijih godina, u povodu 9. maja, „Dana Zlatnih ljiljana“ i „Zlatna policijska značka“, Dana pobjede nad fašizmom, organizuje se tradicionalno druženje članova. Ovo bude dobra prilika da se vidi kako živimo i kakva nam je pomoć potrebna. A ujedno sa ovakvih skupova predstavnicima vlasti pošaljemo određene poruke koje se tiču prije svega očuvanja Bosne i Hercegovine i tekovina za koje smo se borili” izjavio je Zijad Hasečić predsjednik UNRP „Zlatni ljiljani“ i „Zlatna policijska značka“ Općine Ilidža.





## Turnir u šahu za veterane

U prostorijama Osme osnovne škole „Amer Čenanović“, 26. maja 2018. godine održan je turnir u šahu za veterane Četvrtog motorizovanog bataljona-Butmir, a u povodu obilježavanja godišnjice podružnice 10 4. MTB Četvrtе viteške motorizovane brigade. Na turniru je učestvovalo 23 igrača koji su igrali po sistemu 10 minuta po igraču, svak sa svakim. Prvo mjesto osvojio je Mujo Bojadžija, drugo Džeko Škrijelj i treće Fadil Hadžić. Svim učesnicima su uručene zahvalnice, a pobjednicima su obezbjeđeni pehari koji će im biti uručeni na svečanoj akademiji 13. juna u Domu kulture u Butmiru.



## Akcija Udruženja poljoprivrednika

Udruženje poljoprivrednika Kantona Sarajevo 21. aprila je u povodu Dana planete zemlje na lokalitetu četinarske šume u ulici Zeleni ariš -park Šumarskog fakulteta organizovalo akciju čišćenja i odvoza smeća. Učestvovalo je 20 učenika Sedme osnovne škole i Devete osnovne škole, građani kao i članovi Udruženja poljoprivrednika Kantona Sarajevo. Općina je za sve učesnike obezbijedila sendviče, sokove, vreće za pakovanje i rukavice, dok je Udruženje poljoprivrednika obezbijedila kafu, čaj i table sa upozorenjima zabrane odlaganja smeća. Predavanje o očuvanju prirode i okoliša upriličila je nastavnica Deveta osnovne škole Ilidža i predsjednik Udruženja poljoprivrednika Kantona Sarajevo Kadrija Tahmaz.



## Svečano obilježena 50. godišnjica Četvrtе osnovne škole

Četvrta osnovna škola iz Hrasnice, 25. maja 2018. godine u Multimedijalnoj sali na Ilidži u prisustvu učenika, nastavnika, roditelja i brojnih zvaničnika, svečano je obilježila 50 godina postojanja. Za učenike, profesore i uposlenike škole ovo je poseban dan jer uspješno rade već 50 godine i razvili su se u savremenu i respektabilnu obrazovnu ustanovu sa jasnim ciljevima. Škola je osnovana davne 1968. godine pod nazivom „Hasan Brkić“ i tad je imala 776 učenika, od toga 135 prvaca. Danas, 2018. škola ima 327 učenika i 36 upisanih prvaca i nosi naziv Četvrta osnovna škola. U proteklom periodu učenici i nastavnici uspješno su realizovali mnogobrojne aktivnosti i postigli značajne rezultate.

„Hvala vam što ste došli na ovaj veliki i značajan jubilej! Velika mi je čast i zadovoljstvo što kao bivša učenica Četvrtе osnovne škole u ovom trenutku stojim na ovom mjestu zajedno sa vama prisutnim, ali i onima koji nisu tu, a vezani su na bilo koji način za ovu školu, njenu historiju, ali i njenu budućnost, mogu obilježiti 50 godina postojanja škole“, kazala je u svom obraćanju prisutnima direktorica škole Samira Holjan. Učenici i nastavnici priredili su bogat i raznovrstan program. Pojedincima i kolektivima dodijeljene su zahvalnice za njihov nesebičan doprinos i pruženu pomoć školi u cilju unapređenja uslova za rad u odgojno-obrazovnom procesu mladih naraštaja.

## Izviđači čistili Rimski most

Članovi Odreda Izviđača „Vrelo Bosne-Ilidža“ 19. maja učestvovali su u akciji čišćenja prostora oko „Rimskog mosta“ pod nazivom „Siđimo do rijeke budimo dio rješenja, a ne zagađenja“ Pokrovitelji ove akcije su Ambasada SAD, Općina Ilidža i realizator projekta Organizacija za razvoj turizma regije „ROTOR“ Iz Doboja. Po završetku akcije članovi Odreda su posjetile izbjeglice koje se nalaze u Lužanskom polju, i tom prilikom im uručili prehrambene artikle kao i flaširanu vodu.





## Načelnik Memić upriličio prijem za Kapića, prvaka svijeta u jiu jitsu

**P**redstavnik Bosne i Hercegovine na svjetskom jiu jitsu takmičenju u Abu Dhabiju Almir Kapić postao je prvak svijeta u open diviziji, te viceprvak u "ultra heavy weight" diviziji.

Takmičenje je održano u sklopu svjetskog Abu Dhabi profesionalnog šampionata u Ujedinjenim Arapskim Emiratima. Tim povodom načelnik Općine Ilidža prof. dr. Senaid Memić upriličio je u Općini Ilidža 22. maja 2018. prijem za njega i uručio mu novčana sredstva u iznosu od 2.000 KM.

"Čestitam na rezultatima. Ovo su skromna novčana sredstva koja dajemo našim šampionima za njihove rezultate. Vi se uložili mnogo više, ali se nadam da je naša nesebična podrška vašem sadašnjem i budućem radu mnogo bitnija" izjavio je načelnik Memić.

"Hvala Općini Ilidža i Vama načelnice jer ste prepoznali i pokazali interes za moj rezultat. Dugogodišnji trud, ciljevi, sve ono što sam maštao u svijetu jiu-jitse da dođem, do vrha svijeta, svi oni koji znaju ovaj sport znaju da ovo nije mala stvar. Velika je čast nositi zastavu države i na području općine Ilidže imam namjeru formirati klub koji će biti ne samo ponos Ilidže već i BiH" rekao je Kapić. Osim što je uspješan sportista, Kapić je i hafiz Kur'ana.

## Proslavljen Dan Prve osnovne škole

**U**Prvoj osnovnoj školi Ilidža 25. maja proslavljen je Dan škole. Pred mnogobrojnim gostima i bivšim i sadašnjim nastavnicima, učiteljima i učenicima održana je priredba u kojoj su se učenici i njihovi nastavnici pjesmom, recitacijom te igrokazom dotaknuli godišnjice škole, kao i mnogih drugih aktualnih tema. Prije početka priredbe za goste, načelnik Općine Ilidža prof. dr. Senaid Memić i predsjedavajući Općinskog vijeća Muhamed Omerović presjecanjem vrpce otvorili su školsku salu koja je obnovljena sredstvima Općine Ilidža. Za ovu namjenu Općina je izdvojila 180.891,61 KM. Prva osnovna škola na Ilidži osnovana je 1894. godine, pod nazivom Narodna škola, a sada je pohađa 691 učenik.



## Humanost oko nas

**U**povodu Sedmice Crvenog križa i Crvenog polumjeseca tradicionalno su organizovane aktivnosti s ciljem širenja misije Crvenog križa te afirmacije organizacije. Izvještajno svečana sjednica Skupštine Crvenog križa Općine Ilidža održana je u sali MZ Ilidža Centar, na Svjetski dan Crvenog križa, 08. maja. Na Internacionalnom Burch univerzitetu održana je akcija dobrovoljnog darivanja krvi. Studenti i osoblje ovog univerziteta su se po ko zna koji put odazvali humanom činu i na taj način darovali krv koja je od neprocjenjive vrijednosti. Pored dobrovoljnog darivanja krvi, volonteri su distribuirali markice u zamjenu za dobrovoljni prilog te upoznali studente sa aktivnostima Crvenog križa kao i načinu učestvovanja u različitim akcijama. U toku Sedmice Crvenog križa posebnu pažnju su posvetili principu humanosti. U tom duhu porodicama u stanju socijalne potrebe dijelili su pakete hrane koji su donacija humaniste Agana Hodžića. Paketi su su uručeni za ukupno 62 porodice teškog imovnog stanja, u saradnji sa službama Centra za socijalni rad, Općine Ilidža, te u koordinaciji sa mjesnim zajednicama na području općine. Uz pakete iz ove donacije, vršili su i podjelu paketa Crvenog križa Ilidža. Održana je akcija dobrovoljnog darivanja krvi u prostorijama CK Ilidža. Krv je uspješno darovalo 15 građana. Postavljena je i izložba likovnih radova učenika osnovnih škola sa općine Ilidža u okviru projekta "Humanost oko nas". Projektom su nagrađeni najuspješniji radovi. Nakon završetka izložbe upriličen je defile volontera od prostorija CK Ilidža prema Maloj Aleji, pješačkom mostu te parku na Ilidži. Volonteri su nosili istaknute zastave Crvenog križa te simbolično svijeće, a na pješačkom mostu su u znak pušteni lampioni želja.



## Obavještenje za privredne subjekte

**U**centru Skenderija - Sarajevo (19.-21. 06. 2018.) bit će održan Osmi međunarodni sajam energije, rudarstva, zaštite okoliša i prateće industrije Energa 2018.

U okviru sajma 19. juna 2018. godine organizuju se poslovni susreti firmi Energa b2b 2018. godine, sa ciljem da podrže kompanije u pronalasku internacionalnih partnera na sajmu. Učesnici mogu ugovoriti sastanke sa potencijalnim partnerima u skladu sa svojim potrebama i interesima, te direktno razgovarati o mogućnostima saradnje.

Organizatori su Sarajevska regionalna agencija Serda i Evropska poduzetnička mreža u Bosni i Hercegovini uz podršku Privredne komore FBiH, Fondacije za razvoj odnosa BiH i Turske-Bigmev, tuzlanskog sajma, te brojnih međunarodnih organizacija i Agencija za podršku biznisu iz evropske unije i regiona.

Za više informacija o sajmu posjetite <http://energa.ba>.



## KK Ilidža slavi 20 godina

**P**rije tačno 20 godina osnovan je Košaraški klub Ilidža. "Naše stvarno vrijeme ne mjeri se satovima ni kalendarima. Ono se mjeri posebnim trenucima, radostima, događajima koji su nam značili, mijenjali nas i gradili. I onda je naših 20 godina puno. Možda ne dugo, ali sigurno puno - puno radosti, puno emocija, puno sjećanja. Mi idemo dalje sa nekim novim pričama, koje će sigurno našoj Ilidži donijeti puno lijepih stvari" rekao nam je Admir Sakoč iz KK Ilidža.



## Šesti memorijalni turnir "Josip Katalinski Škija"

**Š**esti po redu međunarodni memorijalni fudbalski turnir "Josip Katalinski Škija" održat će se 8., 9. i 10. juna u Sarajevu. Memorijalni turnir igra se u znak sjećanja na Josipa Katalinskog, nekadašnjeg sjajnog fudbalera sarajevskog Željezničara i francuske Nice, te reprezentativca bivše SFR Jugoslavije.

Kako je rečeno na press-konferenciji održanoj 30. maja u Hotelu Delminijum učestvovat će 1.000 dječaka, 72 selekcije iz 40 ekipa i iz Srbije, Crne Gore, Slovenije i BiH. Igrat će se na stadionu Duglodi, Vogošća i na terenu sa umjetnom travom u hotelu Delminijum.

Učestvuju 2005. godište i igrat će na terenu u Vogošći, 2007. i 2009. godište u Duglodima i 2011. godište na umjetnoj travi u krugu Hotela Delminijum.



## Završeno Općinsko takmičenje učenika u fudbalu, odbojci i košarci

**O**pćinsko takmičenje učenika osnovnih škola u košarci, fudbalu i odbojci završeno je 10. maja 2018. godine. U Kulturno-sportskom i rekreacionom centru Ilidža podijeljene su medalje i pehari najboljima. Takmičenje je održano pod pokroviteljstvom Općine Ilidža.

U kategoriji odbojke za učenice prvo mjesto su osvojile iz Četvrtе osnovne škole, drugo Sedma osnovna škola, dok su treće mjesto osvojile učenice Druge osnovne škole.

U kategoriji košarke za učenike prvo mjesto su osvojili učenici Pete osnovne škole, drugo iz Treće osnovne škole, a treće iz Osme osnovne škole" Amer Čenanović".

U kategoriji fudbala za učenike najbolji su bili učenici Desete osnovne škole, drugo Šeste osnovne škole, a treće učenici Četvrtе osnovne škole.



## Akcija aktivista Aleje

**A**ktivisti Ekološkog udruženja "Aleja" oko objekta ambulante u MZ Hrasnica 1, pokosili su zaraslu travu, očistili otpatke, te iste deponovali u kontejnere za smeće.

Članovi su i 13. maja očistili korito za oborinske vode na mezarju Kovači u Hrasnici, gdje su uklonili zaraslo busenje, nakupljene veće količine šljunka, očistili otpatke (smeće) koje se nalazilo u koritu. Oni su poslali poruku svim građanima koji obilaze mezarje, a koji ne odlažu svoje otpatke na predviđena mjesta, da to više ne čine.





**BOSNA I HERCEGOVINA  
FEDERACIJA BOSNE I HERCEGOVINE  
KANTON SARAJEVO-OPĆINA ILIDŽA  
OPĆINSKA IZBORNA KOMISIJA**

Broj: 10-1-05-32/18  
Ilidža, 30. 05. 2018. god.

Na osnovu člana 18. stav (1) Pravilnika o upotrebi i izradi izvoda iz Centralnog biračkog spiska («Službeni glasnik BiH», broj 29/18), Općinska izborna komisija Ilidža na sjednici održanoj dana 30. 05. 2018. godine, donijela je

**PLAN  
IZLAGANJA IZVODA PRIVREMENOG  
BIRAČKOG SPISKA NA PODRUČJU  
OPĆINE ILIDŽA ZA  
OPĆE IZBORE 2018. GODINE**

Izvod iz Privremenog biračkog spiska izlagat će se u roku od 30 dana i to u periodu od 09. 06. do 09. 07. 2018. godine.

Izvod iz Privremenog biračkog spiska nalazit će se u Centru za birački spisak Općine Ilidža i u prostorijama Mjesnih zajednica na sljedećim adresama:

R/B	MJESNA ZAJEDNICA	ULICA	TELEFON
1.	HRASNICA I	Trg branilaca Hrasnice bb	511-600
2.	HRASNICA II	Stari drum br. 48 A	511-585
3.	SOKOLOVIĆ KOLONIJA	Trg 22. Aprila br. 10	514-988
4.	BUTMIR	Butmirska cesta br. 58	685-023
5.	DONJI KOTORAC	Branilaca Donjeg Kotorca do br. 26	684-344
6.	STUP	Nikole Šopa br. 52 A	455-414
7.	STUP II	Dobrinska br. 2 A	622-034
8.	STUPSKO BRDO	Kasima Begića br. 111	460-524
9.	ILIDŽA-CENTAR	Abdulaha ef. Kantamirije br. 2 A	622-089
10.	OTES	Fadila Hadžića do br. 13 A	624-824
11.	OSJEK	Osik br. 292	699-034
12.	VRELO BOSNE	Blažujski drum 17	624-780
13.	VREOCA	Blažujski drum 17	624-780
14.	RAKOVICA	Rakovička cesta br. 341	404-056
15.	BLAŽUJ	Vlakovo br. 170	692-001
16.	LUŽANI	Hamze Čelenke br. 62	621-534

Uvid u izvod iz Privremenog biračkog spiska za birače koji glasaju na redovnim biračkim mjestima, građani će moći izvršiti u periodu izlaganja istih svakog radnog dana u vremenu od 8,00-16,00 sati u prostorijama svih šesnaest (16) mjesnih zajednica na području općine Ilidža.

Uvid u izvod iz Privremenog biračkog spiska može se izvršiti svakog radnog dana u vremenu od 8,00-18,00 sati i u Centru za birački spisak koji se nalazi u sobi br. 15 u zgradi Općine Ilidža, ul. Butmirska cesta br. 12.

Birači koji u periodu izlaganja izvoda iz Privremenog biračkog spiska uoče nepravilnosti i pogrešne podatke, imaju pravo zahtijevati njihovu ispravku ukoliko se radi o ispravci ličnih podataka. Zahtjev se podnosi organu nadležnom za vođenje podataka čija se ispravka zahtijeva.

Raseljena lica sa područja općine Ilidža samo u Centru za birački spisak moći će izvršiti provjeru svojih podataka kao i opredijeliti se za biračku opciju (općina, odnosno mjesto glasanja i način glasanja - lično ili u odsustvu) na predstojećim Općim izborima koji će se održati 07. oktobra 2018. godine.

Općinska izborna komisija će u saradnji sa Stručnom službom za koordinaciju rada mjesnih zajednica održati zajednički sastanak sa sekretarima mjesnih zajednica u cilju njihovog potpunog informisanja vezanog za aktivnosti izlaganja izvoda iz Privremenog biračkog spiska kao i postupkom vršenja ispravki kod nadležnog organa.

Općinska izborna komisija Ilidža će u periodu izlaganja izvoda iz Privremenog biračkog spiska, a u cilju obavještanja javnosti, poduzeti sljedeće aktivnosti:

1. Putem lokalne radio stanice «Radio ASK» emitovat će radio-džinglove u kojima će se birači obavijestiti o periodu i lokacijama izlaganja izvoda iz Privremenog biračkog spiska za područje općine Ilidža.
2. Putem lokalne radio stanice «Radio ASK» Općinska izborna komisija upoznat će građane općine Ilidža o predstojećim Općim izborima 2018. godine prigodnom kontakt emisijom.
3. U saradnji sa sekretarima Mjesnih zajednica obavijestit će se građani da u periodu izlaganja izvoda Privremenog biračkog spiska dođu u mjesne zajednice ili u Centar za birački spisak kako bi provjerili svoje podatke. Ova obavijest biće objavljena na Kantonalnoj televiziji, biltenu Općine kao i na WEB stranici Općine Ilidža.

PREDSJEDNIK

Dino Mulaosmanović, dipl. pravnik

**O B A V J E Š T E N J E**

U periodu od 09. 06. do 09. 07. 2018. godine Općinska izborna komisija Ilidža daje na uvid građanima izvod iz Privremenog biračkog spiska za područje općine Ilidža za Opće izbore koji će se održati 07. oktobra 2018. godine.

Uvid u izvod iz Privremenog biračkog spiska za birače koji glasaju na redovnim biračkim mjestima, građani će moći izvršiti u periodu izlaganja istih svakog radnog dana u vremenu od 8,00 do 16,00 sati u prostorijama svih šesnaest (16) mjesnih zajednica na području općine Ilidža.

Izvod iz Privremenog biračkog spiska će biti izložen svakog radnog dana u vremenu od 8,00 do 18,00 sati i u Centru za birački spisak koji se nalazi u zgradi Općine Ilidža soba br. 15, ul. Butmirska cesta br. 12.

Raseljena lica sa područja općine Ilidža će samo u Centru za birački spisak moći izvršiti provjeru svojih podataka kao i opredijeliti se za biračku opciju (općina, odnosno mjesto glasanja i način glasanja - lično ili u odsustvu) podnošenjem zahtjeva (obrazac PB0-1) do 24. 07. 2018. godine.

Birači koji u periodu izlaganja izvoda iz Privremenog biračkog spiska uoče nepravilnosti i pogrešne podatke imaju pravo zahtijevati njihovu ispravku ukoliko se radi o ispravci ličnih podataka.

Zahtjev se podnosi organu nadležnom za vođenje podataka čija se ispravka zahtijeva.

Za sve dodatne informacije građani se mogu obratiti Centru za birački spisak telefon 033/775-617, 033/763-465 ili na e-mail oikilidza@outlook.com

**OPĆINSKA IZBORNA KOMISIJA**



Na osnovu člana 3. Pravilnika o utvrđivanju uslova, kriterija i postupka za izbor najljepšeg dvorišta i balkona sa cvijetnim aranžmanom, Broj:16-22-1977/15 od 06.05.2015.godine, a u cilju očuvanja tradicije ilidžanskih cvijetnih bašči i parkova, podizanja svijesti građana o značaju uređenja i brige o sopstvenom dvorištu, ulici, mjestu i njegovoj čistoći, očuvanju životne sredini, a što će doprinijeti i boljoj turističkoj ponudi, Općinski načelnik objavljuje:

## JAVNI POZIV ZA IZBOR NAJLJEPŠEG DVORIŠTA I BALKONA SA CVIJETNIM ARANŽMANOM NA PODRUČJU OPĆINE ILIDŽA

### I

Pozivamo sve zainteresovane građane da prijave svoja dvorišta i balkone na takmičenje za izbor najljepšeg dvorišta i balkona sa cvijetnim aranžmanom na općini Ilidža.

Prijaviti se mogu svi zainteresovani građani koji imaju prebivalište na području općine Ilidža.

### II

Odluku o izboru najljepšeg dvorišta i balkona donosi Općinski načelnik na prijedlog Komisije koju će imenovati u tu svrhu, a koja će običi prijavljena dvorišta i balkone, sačiniti foto-dokumentaciju i ocjeniti ih prema sljedećim kriterijima:

- \* Održavanje i urednost dvorišta - balkona;
- \* Prostorni odnosi sadržaja u dvorištu - na balkonu;
- \* Uloženi trud, izbor i njegovanje biljaka, poštivanje tradicije i elemenata našeg podneblja;
- \* Ukupni estetski dojam.

### III

Za najljepše dvorište i balkon dodjelit će se po tri nagrade: prva, druga i treća u sljedećim iznosima:

za dvorište:	za balkon
I nagrada 500 KM	I nagrada 300 KM
II nagrada 400 KM	II nagrada 200 KM
III nagrada 300 KM	III nagrada 100 KM

### IV

Svoje prijave možete poslati putem prijavnog obrasca kojeg možete preuzeti sa web stranice Općine: [www.opcinailidza.ba](http://www.opcinailidza.ba), u prostorijama MZ i info desku (šalter sala) Općine Ilidža.

Prijava treba da sadrži:

1. Ime i prezime;
2. Tačnu adresu, kontakt telefon ili e-mail adresu;
3. Za koju kategoriju natjecanja se prijavljuje (dvorište, balkon).

Zahtjevi se predaju putem pošte, na protokolu Općine Ilidža, ulica Butmirska cesta broj 12, sa naznakom za javni poziv za izbor najljepšeg dvorišta i balkona ili putem e-mail adrese [ilidzaturizam@gmail.com](mailto:ilidzaturizam@gmail.com)

Javni poziv ostaje otvoren do 22.06.2018. godine.

Sve dodatne informacije mogu se dobiti u Službi za privredu i turizam Općine Ilidža, soba 325, kontakt osobe Sitnić Indira i Prašović Adel, telefoni 033 775 755, 775 754.

Želja nam je da bar na trenutak istaknemo u prvi plan ljude koji su odlični primjeri kako neko ličnim angažovanjem može doprinijeti da se njihov najbliži, komšije i slučajni prolaznici osjećaju prijatnije, a samim tim budu i mnogo raspoloženiji te da podjele ljepotu sa drugima.

**ZAHVALJUJEMO NA VAŠIM PRIJAVAMA I UČESTVOVANJU U OVOJ AKCIJI JER TIME DOPRINOSITE  
LJEPOTI I UGODNOJ ŽIVOTNOJ SREDINI, VJERUJUĆI DA ĆE UČESNICI SA OVOG TAKMIČENJA PORED  
NAGRADA PONIJETI I POZITIVNE EMOCIJE I ENERGIJU.**

OPĆINSKI NAČELNIK  
Prof. dr. Senaid Memić